

# Forum cultural Tujetsch

## ha presentau il project num local

**Dacuort ha il Forum cultural da Tujetsch presentau alla populaziun ed ad auters interessents il project dils num local da sia vischnaunca. Cun il Forum cultural posseda la vischnaunca da Tujetsch ina zun impurtonta uniu che sesprova cun bia engaschi e plascher da mantener la cultura en ils uclauns ed en la vallada.** Dapi entgin temps han ils premurai vischins *Bruno Berther* e *Tumaisch Valier* recallgau e registrau digital varga 1500 num local dalla vischnaunca da Tujetsch.

Il biro d'inschignier Cavigelli da Glion ha mess a disposiziun la documentazion dallas parcellas dalla mesiraziun ufficiala. Cun l'applicaziun da Google Earth eis ei stau pusseivel da

presentar als presents visualmein in stupent e beincapiveil project. Grazia al pli niev sistem electronic eis ei reus-siu da francar mintga num local ord tuts encardens dil territori dalla vischnaunca da Tujetsch. Cun quellas apparaturas san ins secapescha era far midadas ni amplificaziuns tenor basegns. Ins sa encuir ils num local dil territori giavischau detagliadamein. Il monitour porta ils maletgs respectiv il territori cun ils num local giavischai sco ina carta illustrada, ina grondiusa caussa.

Duront la presentaziun dil project hiel jeu era patertgau vid pader Ambros Widmer d.p.m dalla claustra da Mustér: El ha rimnau cun paucs gidonters duront biars onns pruamein ro-

dund 3500 num local e funsils dalla vischnaunca da Mustér. El havess segir giu grond plascher digl engaschi dils Tuatschins e dil magnific project che vus haveis francau per la cultura da vos-sa vischnaunca.

Cumpliment e gratulaziun oravontut als iniziants Bruno Berther e Tumaisch Valier sco era a tuts quells che han gidau vid quei project singular. Ils num local e funsils ein scazis culturals e historics da nossas vischnauncas. Aschia fuss ei urgentamein necessari ed opportun sche las vischnauncas dalla Surselva e forsa schizun digl entir Grischun savessen realisar semegliants projects dils num local e funsils sco quei ei succedi a Sedrun.

*Gregori Maissen, Mustér*